



*Jumat, 10 Maret 2023*

**Ogen : Lukas 23:34**



**Ngalemi Salah**



**N**gerana kerna ngalemi salah, erkawiten ras sakit hati (elem-elem). Sakit e erbahanca kita kote, la ergegeh, la semangat dingen ngolangi kerina kreativitas si lit. Lit kalak si ngandingken elem-elem enda bali ras virus. Adi erdekahna virus e i je, reh kelekna me pinakit si jadi. Adi bage tentu perlu kel tambar tawarna.

Ipakuken i bas kayu persilang erbahanca mambur dareh Jesus. Tambah ranana ras perbahanen kalak sideban si ngataken IA kalak jahat ras perbual. Enda me siiananami Jesus. Secara manusia enda pengalamen si seh suina ras sedakna. Tapi la ndekah bas si e, minter Jesus erlebuh entah ertoto nina "O Bapa alemi min kalak enda sabap la iangkana kai si ibahanna." Enda me sikap si encidahken kedewasen ras kengasupen ngaloken kalak sierbahanca ia ngenanami kiniseran. Cara pandang si petembil kel si usur iajarken sedekah enda singataken maka mata ganti mata, cuping ganti cuping. Tapi Jesus ngasup mereken pengampunen man kalak e bas paksa kai si jadi bas ia. Tangkas ilakokenNa maka la sempat ben matawari IA enggo ngalemi kalak si ersalah man baNa. Bas paksa si e me IA ialoken Bapa. Tuhu luar biasa ngaruh ngalemi salah. Bas IA lit kedamen, janah e mabai ia jumpa ras Dibata. Jelasna Jesus la nutup babah sienterem, tapi suankenna i bas pusuhNa maka kalak e la meteh kai si ibahanna.

Jhon Green ngataken maka "satu-satunya jalan keluar dari labirin penderitaan adalah dengan memafkan." Ngalemi salah e me tambar simesintengna guna datken kedamen. Untung man banta pelin-pelin adi kita nggit ngalemi salah kalak man banta. Sabap bas ngalemi salah e, proses ndatken ketenengen. Jesus pe jadi kal ateNa kalak si nggit ngalemi salah, sabap bas ia nari inisiatif perdamen e rehna. I bas kita ngalemi enggo si dalanken sura-sura Tuhan.

*☞ Alemilah sabap kam kap anak-anak Tuhan*